

En vacanza col bonus

Dal prum de messèl la families che vel fèr sia vacanze te la Tèlia pel domanèr l credit de imposta fin a 500 euro. Na forma de sostegn critiche da man di operadores del turism



L bonus vacanze.

Con l decret «Rilancio» l Goern naziunèl à metù a la leta 2,4 miliarc de euro per l «bonus vacanze», n credit de imposta che podarà domanèr la families che dezidarà de endrezèr sia vacanze te la Tèlia. E chest l'è zenz'auto n ben dal moment che serf didamenc per sostegnir l setor del turism metù a dura proa te chisc ultimes meis per la pandemia da coronavirus.

Chest bonus aboncont, desche se pel lejer ence a piata 16, l vegn belebon critica da ma di operadores turistic ajache amò no se sà co fèr a l gestir concretament. E no se sà nience co fèr a l domanèr, per endèna somea che se cogne fèr domana travers na app dedichèda sul sito del MIBACT, l Minister per i bens e l'ativitèdes culturèles e per l turism.

Endèna se sà che l bonus pel vegnir domanà da un component demò de la familia e l sarà de 500 euro. La families con doi componenc arà derit a 300 euro e se l vegn domanà da un single l sarà de 150 euro.

L'agevolazion é fata da doi pèrts. L'80% vegnarà recognosciù desche n rebas sul priesc del fit e l ge vegnarà dat a la struttura che dèsc alberch enveze l 20% podarà vegnir tout jù da la tasses canche vegn fat la declarazions di vadagnes.

A l'hotelier o al fitacartieres con partida IVA ge vegn conzedù coscita n credit de imposta da durèr desche rebors per la pèrt de bonus che corespon a l'80% del rebas al client. La structures no é oblièdes a azetèr l bonus vacanze e n'è jà n muie che à dit che facile no les darà la possibilità vedù la complicazion dapò per l'aplichèr e aer deretorn i scioldi. Amò apede n muie de hotelieres se lamenta del fat che te n moment che i aessa abù più de besegn de aer scioldi te cassa ge vegn domanà de fèr da credit de imposta.

Amò n'otra critica a chesta scomenzadiva del Goern vegn fata per via che podarà domanèr l bonus demò la families che à n Isee che no passa via i 40 mile euro che vel dir cheles con redic mesegn o basc che l'è senester che les posse jir en vacanza. Vegn spezificà ence che l bonus pel vegnir durà te n'outa demò e te na soula struttura. Ge volarà documentèr l paament travers na fattura elettronica o n document comerzièl olache cogn vegnir scrit l codesc fiscal de chi che fèsc domana. Vegn lascé fora duc i turisc che prenota l viac travers intermediaries sui portai web. Se podarà l durèr dai prumes de messèl fin a la fin de dezember del 2020.